

建構台灣研究 ê 台灣學

——《台灣學誌》發刊詞

李勤岸

國立台灣師範大學台灣文化及語言文學研究所所長

《台灣學誌》是台師大台文所創辦 ê 學術期刊。這個台文所是台灣文化及語言文學研究所 ê 簡稱。伊 ê 所名 lò-lò 長，實際上著是「台灣研究」ê 內涵。「台灣研究」予人貼標籤，抹色彩是台灣泛政治化現象現拄現 ê 呈現，這個現象本身 mā 是台灣研究真值得研究 ê 一個題目。「台灣研究」相關系所，無管伊是使用「台灣文學」、「台灣文化」、「台灣語文」、「客家文化」、「原住民文化」、「台灣歷史」、「台灣文史」……攏是「台灣研究」ê 範疇。伊攏應該 tsham 當前學院內底現存 ê 其他學門全款，得著平等 ê 看待，m̄是「顯學」，mā m̄ 是「異端」。

《台灣學誌》ê 創刊 m̄是 kan-na 為著一個研究所 beh 辦一份學術期刊，是為著 beh 參與建構台灣研究 ê 台灣學，beh 為台灣學做疊磚仔 ê 工課。向望早一日伊 tī 學界會當成做一門正正常常、正正當當 ê 學門，bē 予人看無上目，bē 予人另眼相待。

《台灣學誌》會一直追求學術上 ê 平等 kap 多元。無管如何，這是台灣 ê 特色。多元族群、多元語言、多元文化是台灣上大 ê 資產，mā 是台灣學術上大 ê 資產。台灣學應該 mā 是多元 ê 台灣學，平等 ê 台灣學。是為誌。

2010/3/19 寫 tī 台師大台文所